

Proyecto Laguna Dorada unico den su estilo



Inversionista Arubiano Justo Lopez.

ORANJESTAD (AAN)- No mucho siman pasa DIARIO a trece den un di su edicionnan un noticia di un Hotel Flotante cu lo ser construi den Spaans Lagoen, y e inversionista ta un local.

DIARIO a logra un entrevista cu e inversionista aki, ta trata di un persona hopi bon prepara den sector hotelero, un jiu di tera gradua na e mihor schoolnan hotelero na Hulanda y alavez a sigui cursonan universitario den e sector aki. Ta trata aki di Justo Lopez di 39 aña kende na edad di 17 aña a bay studia y traha na Hulanda y a prepara su mes asina bon den e sector hotelero. Justo Lopez a regresa Aruba cu un proyecto den un estilo unico pa construi den Spaans Lagoen, e lagoen cu na edad joven Justo tabata landa y sambuya den dje.


Justo Lopez, fuera di su bon educacion y preparacion na Hulanda, el a ocupa puestonan halto na Hulanda y Japon, esta puesto di director.

" Primeramente Sr. Justo Lopez a duna di conoce cu e proyecto no ta un hotel flotante, pero un hotel traha den un estilo unico aki na Aruba y masha luhoso. Ta trata aki di "Laguna Dorada" un proyecto di dos fase.

E proyecto lo ser construi den Spaans Lagoen. Segun Sr. Lopez lo no dañe e naturaleza di e lagoen, tur matanan di mangel halto lo keda mescos y te hasta tin plan pa planta mas mata di mangel halto e otro parti di lagoen.

Pa por construi e Laguna Dorada, Sr. Justo Lopez mester compra Marina Pirata. Conversacion a ser hiba caba cu e doño y ya tin acuerdo di compra. Pa fin di luna Marina Pirata lo bira propiedad di Justo Lopez.

Kico e proyecto aki ta encera, sin duda hopi hende kier sa. Sr. Justo Lopez a bisa, cu e prome fase ta hopi interesante. Tur cos lo ser traha ariba e altura di lama, lo ser uza materialnan



Esaki ta e sitio unda e hotel Laguna Dorada lo ser construi

especial, tubo especial lo ser manda den profundidad di lama, e floor lo ser construi completamente di marmar, masha luhoso y bunita.

Lo tin 5 restaurant den un estilo unico. Un di e restaurantnan ta autentico japones. Un ta restaurant cu musica suave, romantico y de vez en cuando show di moda. Un restaurant especialmente pa recepcion cu por ser gehuur, charter y tour. Un terras den un estilo unico, unda turistanan y hendenan local por disfruta di e naturaleza y solo. Un salon bar, y mucho mas.

Masha importante ta e sistema cu lo ser uza pa e baño y toiletan. Lo no bay contamina e lama cu sushedad. Tur sushi lo ser manda den un tanki special cu despues lo ser procesa y tira na dump. No tin tuberia di riool cu ta bay pa lama.

Tin partinan creativo pa e bishitantenan fuera di e res-

taurant y barnan, un beach bunita, watersport, jardin botanico, les di windsurfing cu ta den man di hendenan profesional.

E segundo fase ta construcion di e hotel. Ta trata aki di 6 bungalow di 6 unidad cu ta 36 camber. Cada bungalowta di 50 metro cuadra. Nan ta ser construi den un estilo nunca visto aki na Aruba y masha bunita mes.

E inversionista a reuni cu Gobierno, departamentonan conserni, D.O.W., Domeinbeheer, W.E.B. Economische Zaken y Fanapa. E proyecto a ser presenta na un banco local pa mira ki posibilidad tin pa financie. Despues cu banco a studia e proyecto a sali na cla cu e ta un proyecto hopi bon. Y e investigacion ariba e inversionista a sali na cla cu ta trata di un persona serio. E proyecto aki ta uno hopi bon y factible, banco ta dispuesto di duna un



financia, pero banco mester di un garantia di 2.5 Millon.

E inversionista Arubiano Justo Lopez a pidi Gobierno di Aruba un garantia pa e proyecto aki.

Un rapport di estudio a ser haci pa parti di "Touche Ross International Report of Financial" y resultado ta musta bon cla cu ta un proyecto cu vale la pena y sin duda lo bira un exito.

Sr. Justo Lopez no tin duda cu Gobierno lo dune garantia y alavez permiso pa construi e bunita proyecto aki. Manera Sr. Lopez a bisa, cu poco dia ey gobierno a para garantia pa mas di 500 Millon Florin pa varios proyecto, kico ta pa gobierno para garantia pa un proyecto cu ta 1/2 por ciento di e 500 Millon cu ta 2.5 Millon Florin. Finalmente e inversionista local a bisa cu e tin sigur cu e proyecto ta bay door.

Den un proximo edicion DIARIO lo trece un relato con e hotel lo ser maneha.



Asina e hotel lo ser construi segun e plan.

ROBELL TRADING ARUBA

Sale

Pitastraat 2-B(Topcar bai noord)
Diasabra dia 8 okt for di 9'or te cu 4'or p.m.
y
Diadomingo 9 okt for di 9'or te cu 1'or p.m.
Tin e.o. tur sorto di COSMETICS
Tiffa, Pintura di uña, SHAMPOO y mucho mas.
y tambe SNACKS.